



閩南語短篇小說 社會組第一名

秘密

看著黃金生烏衫烏褲、規身重孝，遠遠向伊行過來，陳文平心內有數，麻煩ê代誌來矣。

陳文平是35期第一梯次義務役ê預備軍官，佇衛武營擔任陸軍203師146旅步8營步3連ê少尉輔導長。衛武營是一個新兵訓練中心，基地主要ê任務是負責訓練tú才入伍ê菜鳥仔兵，猶有已經退伍，倒轉來接受教育召集訓練ê後備軍人。

一禮拜進前，師部落公文到所管轄ê各單位，要求連級以上ê主管kap主管，攞愛到師部參加這擺重要ê會議，步3連ê輔導長陳文平kap連長王建成嘛佇參加ê名單內底。

彼个時陣，原任ê總統蔣經國因為長期ê糖尿病引發併發症過身去，爸囡兩人統治臺灣將近五十冬ê蔣家政權，正式結束。由tong時ê副總統李登輝接續下一任，也是頭一个臺灣人ê總統職務。雖然李登輝接任總統是根據中華民國憲法ê規tiānn，m̄過因為長久以來，這部憲法就無受著執政者完全ê尊重kap實施，嘛無得著人民徹底ê支持kap信任，致使李登輝接任總統ê代誌，猶是佇臺北政壇kap國民黨內部，引起bē少爭權奪位ê風聲kap明爭暗鬥ê陰謀。逐工，電視kap報紙吵kah熱phut-phut，害一般老百姓是聽kah霧sà-sà。

也就是因為按呢，政府恐驚會引起社會動亂，影響經濟民生。對外，為著beh警告中kā m̄通輕舉妄動；對內，為著安tiānn全國軍情民心，國防部宣布擴大舉行，年度漢光三號陸海空軍聯合實兵實彈砲火演習，除了現役ê三軍部隊以外，猶koh徵召編制內ê退伍軍人，做伙參加，規模非常大。演習活動ê項目，大部分反空降、反登陸ê戰場，是佇臺灣南部高、屏一帶ê海岸舉行，陳文平所屬ê第8軍團，佇所有參加演習ê部隊內底，

擔任上主要 ê 角色 kap 任務，所以頂面非常重視這擺演習 ê 過程 kap 成果。

會議佇師部基地 ê 所在，屏東龍泉營區盛大召開，總 kā 近 100 人參加。軍團司令黃志強中將親身到位，kā 所有參與 ê 人員精神講話：「我們軍人，受到人民的栽培跟國家的照顧，應該要有堅 tiānn 的責任心跟高度的榮譽感，特別是在此政局不安的時刻，面對兇狠頑強的匪軍，更要有堅 tiānn 的敵我意識，以及犧牲自我的決心，來保衛人民的生命跟國家的安全！」黃志強漢草生做粗勇大樣，講話大聲丹田有力。

「效忠國家元首！消滅萬惡 ká 匪！三民主義萬歲！中華民國萬歲！」會議佇黃司令激動 ê 口號 kap 眾人熱烈 ê 喊喝之下，順利進行、圓滿結束。過無佸久，就聽著伊升做上將，koh 擔任陸軍總司令 ê 消息。

幾冬後，陳文平已經退伍，倒轉去學校教冊 ê 某一工，無張持佇電視內底看著新聞報導，一群退休 ê 中華民國國軍高級將領，佇前陸軍總司令黃志強上將 ê 帶領之下，去到中國大陸，kap 對方 ê 人民解放軍，展開兩岸和平友好聯誼交流活動……。

「國軍與 ká 軍都是中國軍！臺灣與大陸都是中國人！」陳文平一下仔就認出黃上將 ê 身影，身材全款粗勇大樣，丹田全款有力大聲，不而過，講話 ê 內容，kap 以前完全無全款。

規个會議過程，除了黃志強司令精彩 ê 演出 kap 各部門 ê 業務報告以外，師長特別交代，這擺 ê 任務有 khah 特殊，絕對 bē-tàng 有任何 ê 差錯。演習視同作戰，教召視同現役！這段期間，各連隊 ê 軍士官兵一律不准請假，nā 有特別原因需要請假，時間上濟以一日為原則，並且愛經過營長 ê 允准才會使得。想 bē 到才報到 ê 頭一工，黃金生就 beh 來請假。

「報……報告，你敢……敢是輔 ê hōnn？」黃金生來到陳文平 ê 面頭前，行禮了後，按呢問。

「我就是，有啥物代誌？」陳文平回禮 ká 應。

「我...我 beh 請假！」黃金生手裡提幾張資料，交予陳文平。

黃金生，人生做細漢細漢、sán-pa sán-pa，規身軀予日頭曝 kah 烏金會反光，講話又 koh 小可大舌大舌。伊是高雄茄荳人，原來，接著教育召集令無佸久，in 老爸就破病過身去矣。厝裡無兄無弟、無某無猴，除了伊咧討海趁食以外，猶有一个中風半身不遂 ê 老母 kap 一个智能不足 ê 小妹，攏靠伊咧照顧、食穿。In 老爸過幾工就 beh 出山矣，所有喪事離離 khok-

khok ê 代誌，攞愛伊一個人去發落，所以一報到，就趕緊來 tshuē 連輔導長陳文平 beh 來請假。

「你哪會無事先 kā 鄉公所負責 ê 人申請緩召？」陳文平斟酌 kā 黃金生交予伊 ê 資料看過一遍，內底有病院開 ê 死亡證明 kap 村長出 ê 清寒證明。

「報……報告，有……有啊，公……公所 ê 人講…講…」黃金生一下緊張，講話愈大舌。

「你 m̄-bián koh 報告矣，話 táuh-táuh 仔講就好，mài 緊張。」陳文平看伊按呢，趕緊 kā 安慰。

「公……公所 ê 人講，講先來報到以後，才……才共單位請…請假就好矣。」黃金生總算 kā 意思講清楚。

「平常時是按呢無 m̄-tiòh，m̄-ku 這擺 ê 情形有 khah 特別，因為是 tng 著重大演習 ê 關係，頂面規 tiānn，上濟 kan-na 會當請一工假爾爾。」陳文平耐心 kā 黃金生解說清楚。

「一……工哪有夠？」黃金生對陳文平 ê 回答感覺淡薄仔意外。

「你拍算愛請幾工才有夠？」陳文平聽會出黃金生 ê 失望。

「上無……上無嘛愛三……三工！」黃金生總算講出伊 ê 意見。

黃金生講 ê 是實在話，這款代誌陳文平嘛 bat tng 過。三冬前，in 老爸因為車禍意外往生去。咱臺灣人 ê 風俗，厝裡無論好額散，辦一个喪事，包括法事、拜飯、做旬、出山、入土……等等有 ê 無 ê，前前後後，上少嘛愛規禮拜 ê 時間，何況黃金生是厝裡唯一 ê 孝男，事事項項攞愛家已發落，三工嘛無一 tiānn 有夠，何況是一工？

按照軍中 ê 制度，輔導長 ê khang-khuè 內底，其中有一項是負責處理阿兵哥日常生活 ê 困難無 m̄-tiòh。以前 nā 是 tng 著這種代誌，陳文平只要佇假單頂面簽名 tng 印仔，koh 送去予連長批准就會使矣。M̄-ku，這擺無全款，伊無權力准假，照理講，這 m̄ 是伊 ê 責任。

是講，看黃金生彼款無助 ê 表情，伊實在不忍心 kā 拒絕，姑不而將，陳文平 tshuā 黃金生到連長室，kā 連長報告這項代誌。

「報告連長！」陳文平 kā 黃金生 ê 情形，詳細報告講予連長知影，請示伊 ê 看法。

連長王建成中尉，屏東內埔人，陸軍官校 50 期正期班砲科畢業，做代誌非常 ê 鉅鉅角角，做人嘛小可龜龜毛毛，不而過，猶算是一个正派、

明理 ê 人。聽講伊當初時大學聯考考 tiâu 私立大學，因為厝裡作穡、生活散赤，納 bē 出學費，所以才無奈放棄大學，改讀公費 ê 軍校。M̄ 知是 m̄ 是因為這個緣故，予伊 ê 心內無啥平衡，平常時對連上一般 ê 大專兵抑是預官排長，攏無好面色，不時予伊釘 kah 親像臭頭雞仔，kan-na 對陳文平誠客氣，這可能 kap 伊 ê 小妹 tú 好是陳文平讀師範大學時陣 ê 學妹有關係。

「伊 ê 情形，我會當理解，嘛真同情，m̄-ku 頂禮拜你才 kap 我同齊去師部開過會，你嘛知影師長 ê 要求 kap 規 tiānn，咱 kan-na 會當聽命令。」聽 suah 陳文平 ê 報告，王建中按呢回答，意思明白、口氣堅 tiānn，面頂無任何 ê 表情。

「伊 ê 問題有 khah 特殊，是 m̄ 是會當特別處理？」陳文平猶咧想辦法說服王建成。

「這擺 beh 請假，攏愛經過營長 ê 同意才會使得，我嘛無權力 thang 允准，無你敢 beh 去請示營長看 māi？」王建成 ê 態度放 khah 落軟。

陳文平 tuì 連長室出來，心內感覺真為難。In 步 8 營 ê 營長吳貴宏中校，是全部隊上出名、歹剃頭 ê 人物。伊有一个外號，叫做「龜仔宏」，kap 步 7 營 ê 營長馬尚德、步 9 營 ê 營長朱正國，合稱 146 旅「三獸」。不而過，這個「獸」m̄ 是彼種驍勇無敵、能征善戰 ê 「猛獸」，是三隻耀武揚威、專門食人 ê 「禽獸」。其中，尤其吳貴宏特別匪類。

吳貴宏長期以來，食錢、淋酒、跋筴、飼查某 ê 空頭，是規个 8 營通人知 ê 代誌。M̄-nā 是假日，連平常時仔嘛 tiānn-tiānn 走 kah 無看人影，抑無，就不時醉 kah m̄ 知天地。精神 ê 時陣，差不多規營 ê 大大細細、軍士官兵攏予伊罵透透，私底下，逐家攏供體講：「甘願去 t̄ng 著「鬼」，無愛去看著「龜」。」

會記得舊年年底，吳貴宏又 koh 淋 kah 醉茫茫，三更半暝才倒轉來營區。M̄-tsai 是按怎，無 beh 去歇暈，開始起酒 siáu。暗時十二點外，全營五个連 ê 軍士官兵攏接著營部戰情官 ê 命令：所有 ê 人，十分鐘內，全副武裝到營集合場集合完畢！營長 beh 點名。十分鐘後，全營到齊，營值星官 kā 部隊整理好勢，入去營長室報告。十分鐘...三十分鐘...一點鐘過去，猶是等無營長出來，所有 ê 人就按呢，佇半暝一點、溫度十度 ê 營集合場罰倚。營值星官忍 bē tiâu，koh 入去請示，出來了後，輕輕仔喝一聲：「解散！」無講任何理由。

眾人沿路行、沿路橋，拖著沉重 ê 跂步，才倒轉來到連部 ê 門
跂口，值班 ê 安全士官 tú 好生狂從出來：「營部又 koh 通知，所
有 ê 人，五分鐘內，營集合場緊急集合」。Tàng 眾人趕緊走轉來
營部 ê 時陣，吳貴宏已經 the 佇籐椅頂懸，規身軀臭酒味，規个面
紅絳絳，對全營 ê 人開始罵，開始警……。

陳文平一直感覺足奇怪，m̄ 是講咱軍隊就親像是一个大家庭？
m̄ 是講咱軍士官兵攏是家己 ê 同袍兄弟？哪有人三不五時、開喙合
喙，就是咧警家己兄弟 ê 老母 ê ？尤其是長官對部下，這款公然 ê
侮辱，做部下 ê 人，哪有可能口服心服？按呢是 beh 按怎來「精誠
團結」？是 beh 按怎去「消滅共匪」？這是啥物惡質 ê 軍隊文化？

想起吳貴宏，陳文平一直 hainn 頭，想 beh 規氣 kā 黃金生講，
伊實在是無法度 kā 鬥 sann-kā, m̄-ku, 看著黃金生彼款無辜 ê 眼神，
心肝又 koh 放落軟，吐一个大氣，向營部 ê 所在行去。

陳文平先到營輔導長室 tshuē 伊直屬 ê 頂司營輔導長，tshuē 營
輔導長 m̄ 是 beh 拜託伊，伊知影這是加了時間，根本無路用。M̄-
ku, 按照制度，陳文平先愛 kā 伊報備才會使。

營輔導長藍紹伯少校，政戰學校正期班 48 期新聞系畢業。做
過兵 ê 人差不多攏知影，政戰人員是專門負責部隊 ê 組織 kap 情治
ê 任務，予人 ê 感覺，通常是神祕、im-thim、甚至奸詐 ê 印象，m̄
知是按怎，藍紹伯 tú 好顛倒 píng, 伊溫吞、荏懶又 koh 散形，啥
物代誌攏 tenn 做 m̄ 知影，啥物情形攏放咧無 beh 管，規身軀除了
彼 su 衫褲以外，實在看 bē 出來伊是一个軍人；除了領頂彼个軍種
符號，更加看 bē 出伊是一个政戰軍官。真正有影是一隻規工食肥
肥，激槌槌；食飽飽，等放假 ê 米蟲。照理講，伊是吳貴宏以下，
全營地位排第二坎 ê 人物，實際上，連上細尾 ê 大頭兵都看伊無現，
私底下，眾人攏譬相伊號做：「孱鳥伯仔」，嘛有人用華語副洗伊
『爛掃把』，伊就算聽著嘛是無要無緊，伊 kap 營長吳貴宏真正 tú
好是極端 ê 一擔頭。奇怪 ê 是，吳貴宏完全 m̄-bat 去管過伊，m̄ 知
是有啥物空頭佇伊手裡，抑是根本早就對伊 tshéh 心、看破？

「我才泡一 kóo 好茶你隨知影，真正好鼻師？來！讚 ê 喔，正

港彼引過來，陳年 ê 臭痞茶。」藍紹伯上大 ê 興趣就是泡茶 sng 茶 koo，看陳文平入來，趕緊 thìn 一甌 thèh 予伊。

「輔 ê，我 m̄ 是來啲茶 ê，是 beh 來請假 ê。」陳文平 kā 黃金生 ê 代誌簡單講一遍予藍紹伯聽。

「一工就好矣，敢講無夠用？」藍紹伯一面聽，一面講，一面 thèh 一 tè 鹿仔皮咧保養伊 ê 寶貝茶 koo。

「幹！就算 lín 兜無死過人，嘛 bat 看過人咧辦喪事，一工哪有夠？」陳文平警佇心肝內。

陳文平猶會記得，當初考入去大學一年 ê 時陣，系裡 ê 學長就來苦勸伊加入國民黨。學長講，入黨對咱以後 beh 做公教人員 ê 人，khah 有好處，陳文平彼時就聽學長 ê 話，申請入黨。到大學四年下學期，準備 beh 參加預備軍官考試 ê 時陣，koh 有真濟查埔學生加入國民黨，因為逐家攏知影，入黨才有機會錄取 khah 輕鬆 ê 政戰官科，若無，就算你成績 koh khah 好，嘛只有去做步兵排長 ê 機會。後來放榜 ê 結果，真正是按呢。

雖然政戰人員有伊顧人怨 ê 一面，m̄-ku 嘛是有伊有路用 ê 所在。陳文平是義務役 ê 預官，時間一到，就退伍矣，無法度升官嘛無機會發財。就親像一般 ê 老兵所講 ê：「做兵是咧做交代 ê，m̄ 是咧做信用 ê。」雖然，伊看 bē 起有 ê 職業軍人，為伊家己 ê 利益，去出賣別人 ê 前途。M̄-ku，伊嘛無愛親像藍紹伯按呢，食飽、等死、做米蟲！該伊 ê 責任，伊無 beh 逃避，伊天生 gē-siâu 惡勢力，同情弱勢者。

陳文平問營部人事官，知影吳貴宏現此時人 tú 好佇營長室，吩咐黃金生留佇外口等候，家己入去見營長。

「報告營長！3 連輔導長陳文平有代誌請示。」陳文平直直倚佇吳貴宏 ê 面頭前行禮。

「嗯？」吳貴宏身軀 the 佇籐椅，雙趺 khuè 佇桌頂，目睷 sa-bui sa-bui，若親像才睏起來 ê 款。

「我 ê 連裡有一个教召兵，最近因為老爸不幸過身，厝裡趕緊咧辦喪事，想 beh 請假。」陳文平 kā 相關 ê 資料園佇吳貴宏 ê 辦公桌頂。

「按照規定請假，上濟一工。」吳貴宏資料連看嘛無看，直接指示。

「報告營長！一工無夠，需要三工……」陳文平趕緊 kā 黃金生 ê 情形向吳貴宏說明

「他媽的！演習視同作戰」，你這個輔導長敢講 m̄ 知影？一旦發生戰爭，厝攏無矣，人攏死了，猶有啥物時間 kap 心情請啥物喪假、辦啥物喪事？」吳貴宏無等陳文平講了，大聲阻止。

「雖然演習視同作戰」，m̄-ku 到底 m̄ 是真正咧戰爭，法律嘛愛兼顧人情……。」陳文平猶 m̄ 死心，想 beh 進一步解說。

「操你媽個屌！你白痴啊？」這是命令！你聽無啊？koh 再囉唆，我連一工攏 m̄ 准！kā 我出去！」吳貴宏大聲、出手 kā 資料向陳文平 t̄n 過去，散掖掖落 kah 規塗跂，一個人目睷青 gìn-gìn、面色惡 giâ-giâ，nā 親像 beh kā 陳文平拆食落腹仝款。

陳文平趕緊離開營長室，外口營部 ê 人員照常來來去去，感覺真自然，bē 輸一點仔攏無代誌發生仝款，應該是早就慣勢、麻痺矣。Kan-na 黃金生倚佇門口聽 kah 面仔白死殺，可能是去予驚著 ê 款。

「幹！龜仔宏，你做營長是咧 hiau-pai 啥 siâu？以後退伍，路頭路尾，m̄ 去予恁爸 tú 著！Kan-na 會曉牛 tiâu 內惡牛母，敢有才調去 kap 阿 kā 仔相戰？我看猶未出門，一銃就先予家己 ê 人拍拍死矣！」陳文平感覺足 bē 爽快，心內沿路想、沿路警、沿路行 beh 倒轉去連部。

「輔……輔 ê，歹……歹勢！」黃金生綴佇陳文平 ê 尻川後，害陳文平為伊 ê 代誌，去予吳貴宏糟躑，伊感覺真失禮。

「你有啥物拍算？」行到半中途，經過訓練場路邊，陳文平雄雄停落來，uāt 頭問黃金生。

「啥……啥物？」黃金生一路躑神躑神，無斟酌著陳文平 hiông-hiông 停落來講話，一時聽無清楚伊咧問啥物。

「請假 ê 代誌，tú 才營長起 siâu ê 情形，你嘛有看著，m̄ 是我無通 kā 你鬥 sann-kang，真正是無法度。」陳文平 tshuē 一个所在坐落來，先抽一支寶島 ê 薰，家己點予著，才 koh 提一支予黃金生。繼落，大力軟一喙，才勻勻 kā 煙歎出來，nā 親像 beh kā 規腹肚內 ê 怨氣做伙吐出來。

陳文平本底無食薰，落部隊 ê 時，聽學長 ê 經驗：「薰是 kap 部下溝通，上方便、有效 ê 橋樑。」伊才開始有食。軍中配給 ê 是長壽 ê，siunn 厚，伊食 bē 慣勢，攏送予其他 ê 阿兵哥，伊 khah 恰意寶島 ê 口味。

「多……多謝！」黃金生趕緊 kā 薰接過來，仝款是大力 suh 一下，m̄ 知是 m̄ 是 beh kā 所有 ê 無奈 kap 委屈攏總吞落去？

「Kan-na 會當請一工假，你有啥物拍算？」陳文平 kā 薰屎踏予 hua。

「逃兵！」黃金生 tiām-tiām 無出聲，過一下仔，雄雄喝一句，大聲 koh 無跳針。

「啥...啥物？你講啥物？」這遍 suah 換陳文平變大舌。

「逃兵！bē 當請假，只好逃兵！」黃金生 suh 一喙薰，出力 kā 薰屎 tàn 落塗跤，火金星仔 sih 咧 sih 咧，親像怒火。

「逃兵？你 m̄-thang 烏白來，掠著 beh 按怎？至少關兩三冬呢，哪會和？恁老母 kap 小妹 beh 寄啥人飼？」做兵將近 beh 兩冬，陳文平 bat 聽過有人因為 bē 堪得艱苦逃兵，嘛有看過新兵因為忍 bē tiâu 老兵欺負逃兵，頭一擺 t̄ng 著受訓一個月 ê 教召兵因為請假 ê 代誌 beh 逃兵，感覺真離譜嘛誠悲哀，趕緊 kā 後果 ê 嚴重性講出來。

「逼著矣，我就 kap 伊拚，抑無 beh 按怎？阮老爸敢會當無人送？敢會當無人埋？」黃金生愈講愈激動，目屎 kiông-beh 輾落來。陳文平 thèh 薰 beh 予伊，黃金生趕緊提家己 ê 長壽 ê 出來，先敬陳文平，家己才 koh 點一支，兩人就佇訓練場 tiām-tiām 食薰.....。

「你先 mài 著急，我才 koh 替你想看有其他 ê 辦法無？」陳文平吐一口氣，giáh 頭看對連部 ê 方向去，已經是食暗頓 ê 時間矣，腹肚攏 bē 感覺枵，一个頭殼亂糟糟，m̄ 知 beh 按怎，kan-na 會當先空喙薄舌安搭黃金生。

倒轉去連上 tú 好 t̄ng 著好朋友李明哲，陳文平叫黃金生 mài 煩惱，先去食飯。伊 kap 李明哲做伙行去軍官餐廳。

李明哲是陳文平大學 ê 同窗兼室友，連佇北投復興崗政戰學校受訓 ê 時陣，嘛 tú 好睷頂下鋪。落部隊 ê 時，李明哲分發到 203 師師部擔任政戰官，兩人誠有緣分，會使講是熟似誠久 ê 老朋友。這段時間，因為 203 師有幾個單位，負責接訓教召 ê 任務，李明哲 kap 師部 ê 長官，專工做伙落來衛武營，視察各單位準備 ê 狀況，順這個機會，撥工來 tshuē 陳文平。

「t̄ng 著你真 tú 好，你人佇師部，敢會當替我問看 m̄i，看有啥物辦法無？」陳文平 kā 黃金生 ê 代誌，講予李明哲知影。

「你已經盡力矣，mài 加管閒仔事敢好？」李明哲知影陳文平愛打抱不平 ê 個性，驚伊加惹是非，按呢 kā 苦勸。

「見死不救，我會良心不安，你就看我 ê 面子，予我拜託一下？」陳

文平猶是 m̄ 放棄。

「好啦！好啦！我來想辦法，下暗轉去 siunn uànn 矣，明仔載等我 ê 電話。」李明哲看陳文平遐爾堅持，無法度，只好答應。

彼暝，欲歇暝進前，陳文平 koh kā 黃金生叫來辦公室，kā 伊講請假 ê 代誌，已經拜託朋友去處理矣，明仔載就會有結果，m̄-bián 過頭煩惱。另外，交代值班 ê 安全士官，愛特別注意黃金生 ê 舉止行動，m̄-thang 去予偷走出去。

陳文平家已倒佇眠床頂，反來反去、暝 bē 落眠。黃金生是一個老實古意 ê 庄跤人，接著教育召集令，kā 喪事 khng 咧，先來完成報到 ê 手續，伊按呢已經盡著國民 ê 義務，嘛對會起這個國家。今仔日，若是因為演習 ê 規定，bē 當予伊請假轉去，實在無夠情理，按呢是咱軍隊 siunn 過拗蠻，是咱政府對 bē 起人，萬一害伊逃兵，看 beh 按怎？向望明仔載，李明哲會有好消息……。

「同學！無法度啦，你害我予人罵 kah kiông beh 臭頭去。」隔工早起，李明哲就敲電話來予陳文平，當等一暝，猶是等著歹消息。

「啊好啊，既然你這籬少將無擔當，就換我這個少尉來做主！」陳文平聽一下，性地 giâ 起來，去 tshuē 連長參詳。

「我知影演習視同作戰 ê 規定，我嘛了解，今仔日假使真正發生戰爭，一大堆人攏家破人亡矣，哪有彼款時間 kap 心情去請喪假、辦喪事 ê 道理。問題是實際上現此時並無戰爭發生，將心比心，換咱是黃金生伊 ê 立場，因為一個軍事演習，bē tàng 轉去發落老爸 ê 後事，咱是 m̄ 是會一世人遺憾、怨嘆？」陳文平一口氣 kā 心內 ê 話攏講講出來。

「你講 ê 道理我了解，問題是，你過幾個月就會當退伍矣，我愛 koh 佇遮幾十冬，萬一若出代誌……」王建成話無講了，陳文平已經聽有伊 ê 意思。

王建成 kap 陳文平無仝款，伊是志願役 ê 職業軍人，做官就是伊 ê 事業，萬一出啥物差錯，攏會影響伊未來 ê 前途，伊當然無可能違反規定，為一個無熟無似、無關無係 ê 教召兵去冒險，這點陳文平會當理解。

「按呢啦！這項代誌你就當做 m̄ 知影，予我專權來處理，萬一 nā 是出啥物問題，我保證全部擔起來，絕對 bē 去連累你。」陳文平 m̄ 知是去食著啥物好膽藥仔，kā 王建成講出伊 ê 想法。

「你……」王建成想 bē 到平常時誠溫和 ê 陳文平竟然會遐堅持，恬想一下仔，頓頭無講話。

離開連長室，陳文平即時 kā 黃金生叫來伊 ê 辦公室，吩咐伊無論啥物代誌，千萬攞 m̄-thang 去 kā 別人講，趕緊去 khuán 物件，伊 beh 准伊三工假，等咧，順繼 tshuā 伊出營門。

照營區 ê 規定，軍官會當自由出入大門，士官兵就愛檢查證件 kap 假單，若是軍官 tshuā 士官兵做伙出入，一般 ê 衛兵攞會尊重軍官，bē 去為難士官兵。陳文平佇衛武營一冬外矣，kap 門口 ê 衛兵攞真熟似，看著伊 tshuā 人 beh 出去，無加講話，直接行禮就放人矣。陳文平 tshuā 黃金生出去營門，吩咐伊三工後倒轉來 ê 時，一 tiānn 愛先敲電話予伊，到時伊會親身來 tshuā 伊入去，按呢，衛兵才 bē tshuē 麻煩。

交代了後，看黃金生坐車離開，陳文平吐一个大氣，代誌總算處理好勢，希望 m̄-thang 出啥物差錯才好。

黃金生離開 ê 第二工暗暝，連上暗點名結束，眾人攞準備 beh 歇睏矣，陳文平 hiông-hiông 接著黃金生 ê 電話，講伊人已經轉來矣，這馬佇營區門口附近 ê 檳榔擔咧等伊。

「奇怪？這籬黃金生應該是明仔載才收假，哪會提早轉來？到底又 koh 發生啥物代誌？」陳文平趕緊換衫出去，沿路行、沿路想。

原來，第二工下晡，黃金生送伊 ê 老爸上山頭以後，擔心陳文平去予伊連累著，先 kā 重要 ê 代誌趕緊發落好勢，彼暝就提早趕轉來矣。

陳文平 kā 黃金生 tshuā 入來連上，叫伊先去歇睏。看連長室燈火猶光光，順 suà 去 kā 王建成報告。兩人 tàng 咧講話 ê 時陣，安全士官生生狂狂走來報告，原來是接著通知，十分鐘後，全連所有人員佇連集合場緊急集合完畢，公差勤務一律暫停，師長親身 beh 來點名。

「一等兵機銃手黃金生？」「有！」當師長賀慶華少將點著黃金生 ê 名，陳文平用目尾偷看佇伊邊仔 ê 連長王建成，發覺王建成嘛全款咧偷看伊，兩個人目光相接彼時，陳文平感覺規個人起一陣 ka-lún-sún，一身軀 ê 清汗攞拚出來。

一個月 ê 教育召集訓練，總算平安、圓滿結束。差不多一禮拜後，陳文平接著營區門口衛兵 ê 通知，有人佇會客室等 beh tshuē 伊面會。陳文平感覺真奇怪，做兵將近兩冬，已經是 beh 退伍 ê 老鳥矣，這個時陣，哪

koh 會有人來面會？行到門口附近 ê 會客室一下看，想 bē 到，原來是伊——黃金生。

「輔……輔 ê！你好，誠久無……無看。」黃金生看著陳文平行入來，人笑微微，趕緊 tuì 椅仔頂倚起來。

「你哪會有閒來遮？」陳文平感覺淡薄仔意外。

「啊……啊最近歇暈，想講來……來看你一下。」黃金生正手 thèh 一 pī 烏魚子，倒手 kuānn 一筐仔水果，做伙交予陳文平。

「你來就好矣，哪著遐工夫？」陳文平 m̄-bat tng 過這款代誌，感覺 bē 慣勢。

「輔……輔 ê 多謝你，我這……這世人攞會會……記得你 ê 恩情！」黃金生無張無持，雙跂 hiông-hiông 跪落去。

「M̄-thang！你 m̄-thang 按呢！」陳文平驚一 tiô，無想著黃金生會行這款大禮，趕緊 kā 伊摸起來。

黃金生倒轉去以後，陳文平心內感覺真歡喜，總算做一項有意義 ê 代誌。原本掠準 in 兩人 ê 秘密，就按呢有驚無險，順序過去矣，無疑悟終其尾，代誌猶是來 piak 空，有人將陳文平偷放黃金生 ê 代誌，去 kā 頂面密告。

彼工，藍紹伯 khà 電話予陳文平，叫伊即時過去營部報到，聽口氣，陳文平就知影代誌大條矣。

「你真大膽！敢違反規定？Tsit-má 代誌脫箠矣，看你 beh 按怎交代？」藍紹伯全款是 thèh 是伊 ê 寶貝茶鉗咧保養。

「啥物代誌？」陳文平明知影，猶是刁工問。

「啥物代誌？你想講偷偷仔 kā 教召兵放假出去無人會知？你政戰 ê 咧做假 ê 喔？你愛有心理準備，老大 ê 做人，你嘛知影……」藍紹伯手比 tuì 營長室 ê 方向。

「你敢有熟似頂頭彼種 khah 大粒、有發角 ê 人？」藍紹伯看陳文平無講話，hiông-hiông koh 問一句。

「啥物發角？」陳文平 gāng 一下，聽無藍紹伯 ê 意思。

「幹！suah m̄ 知影天頂彼款有發角 ê 星？」原來藍紹伯是問伊有熟似啥物大官抑是將軍 thang 好討救兵無？陳文平一个南部庄跲大漢 ê 作田囡仔，哪有可能有這種關係，看來這遍伊真正是死路一條矣。

藍紹伯雖然 m̄ 是一個好 ê 軍人，m̄-ku 基本上，猶算是一個好人，這一冬外來 ê 做伙，陳文平相信藍紹伯應該是 bē 去陷害伊才著。當然，嘛無可能去 kā 伊鬥出跤手，這件代誌，伊家已愛去面對，面對吳貴宏這關。想著彼隻魔頭，陳文平規个心情攏沉重起來。

雞卵 khah 密也有縫，何況是軍中這種明 ê、暗 ê，四界攏有 jiàu-pê 仔咧查探、監視 ê 所在？政戰出身 ê 陳文平哪會 m̄ 知影，伊早就有心理準備，並無感覺意外，不而過，代誌真正發生，猶是加減會煩惱。進前，伊就想過矣，伊是義務役 ê 預備軍官，時間一到，就退伍矣，伊 bē 升官發財，嘛 m̄ 驚記過調職，這對伊攏無啥物影響，唯一擔心 ê 是——軍法……。

吳貴宏敢會做遐絕？

天公伯仔總算猶有目矐，佇陳文平當咧擔心吳貴宏 beh 按怎出手對付伊 ê 時陣，營部彼引傳來一個大消息：吳貴宏出代誌矣！

進前，吳貴宏為非糝做、烏魯木齊 ê 行為，頂面早就咧注意、調查矣，這擺教召期間，伊 koh 公然「食兵」、「賣假」。也就是一方面，接受教召兵 ê 招待，利用暗時，偷走出去外口淋燒酒、開查某；另外一方面，接受教召兵 ê 烏西，私底下，偷放人出去歇假。結果去予師部政三 ê 監察官查 kah 一清二楚，證據充分，連早前偷食公款、包餉查某 ê 空縫，做伙算數，最後撤職收押、移送法辦。

兩個月後，陳文平總算等著退伍令，簡單 kā 行李 khuán 好勢，即時離開營區，這個關禁伊將近兩冬，無形 ê 監獄。

作者感言



陳正雄 台文筆會理事

這個故事，是 20 外冬前，我做兵的時，所拄著的代誌。想袂到經過遐爾久的時間，軍中的人權，猶是無進步；部隊的領導，全款無人性。這款的軍隊，欲按怎守衛國家？欲按怎保護人民？